

DISPUTATIO MEDICA INAUGURALIS

De

MORBIS HABITUALIBUS,

Quam

RECTORE MAGNIFICENTISSIMO
SERENISSIMO PRINCIPE AC DOMINO
DN. FRIDERICO VVILHELMO,
MARCHIONE BRANDENB. ELECTORATUS
HÆREDE &c. &c.

JUSSU GRATIOSÆ FACULTATIS MEDICÆ,
SUB PRÆSIDIO

DN. GEORGII ERNESTI STAHL,
D. ET PROF. PUBL. h.t. DECANI,

PRO LICENTIA,

Summos in ARTE MEDICA Honores, Juraq; & Privilegia legitime capeffendi,

Ad d. Maj. MDCXCVIII. horis ante & pomeridianis

Publicæ disquisitioni proponet

ANDREAS CHRISTIANUS RHETIUS,
Arnstadiâ Thuringus.


HALÆ MAGDEBURGICÆ,
Typis CHR. HENCKELII, Acad. Typogr.

ILLUSTRISSIMO ATQVE CELSISSIMO
COMITI AC DOMINO,
DOMINO
ANTHONIO GUN-
THERO,
SACRI ROMANI IMPERII
QUATUOR-VIRO
COMITI
IN SCHWARTZBURG ET HOHNSTEIN,
DYNASTAE
ARNSTADIAE, SONDERSHUSAE, LEUTENBERG
LOHRAE ET CLETTENBERGAE,
&c. &c.

COMITI
AC DOMINO MEO
CLEMENTISSIMO,

Hanc
Disputationem Inauguralem

Humillimè & submissè
offero
ANDREAS CHRISTIANUS RHETIUS



PROOEMIUM.



Non exigua Praxeos Clinicae difficultas est, quòd subinde affectus occurrant, qui vel per frequenter Patientem denuo invadunt, & sæpius, velut ex improviso, repullulant; vel medicamenta etiam alioqui efficacissima ita frustrantur, ut sæpè numero unus idemq; Pateriens in tali affectu quem jam aliquoties expertus, & ab eodem satis commodè liberatus est, alia vice à consimili methodo & medicamento, nihil planè levaminis nanciscatur.

Ut enim nihil dicamus de reliqua contumacia variorum morborum, hæc ipsa sanè sæpè numero ita & Patientem infestat, & Medicum fatigat, ut Ille quidem vires, aut ad minimum patientiam; Hic vero bonam opinionem tum aliorum de se, tum sui ipsius de Arte, non raro concussam experiatur.

Certè, cum Medicina non purè & unicè actione, Therapia, sanatione, absolvatur, sed magnam partem etiam in Scientia, Prognosi, Prædictione eventus; & Diagnosi causarum incorrigibilium, fundetur & verse-

tur: Nisi exactius harum rerum peritus sit Medicus, periclitatur omni modo de existimatione sua, quando contumacium ejusmodi & rebellium affectuum non satis probabiliter, imò verò sensibilibiter, edifferere valet eventum.

Eò itaq; omni modo eniti ipsum decet, ut hujus circumstantiæ solerti indagatione, non modo rationem reddere valeat; sed etiam prudenti & judiciofa pen-
sitatione speculari, an non aliqua Methodus, & quænam in specie, pro causarum diversitate, institui possit, qua ejusmodi defectibus efficaciter succurratur: & illud quidem vel ad plenariam eorum percuracionem, vel ad minimum ad mitigationem, præcautionem, interver-
sionem.

Affectuū ejusmodi censum si non omnem, grandē constituunt, MORBI HABITUALES, qui si ex suo ge-
nere tantum à Medico æstimentur, nequē hæc ipso-
rum formalitas, diuturna assvefactio, admodum cir-
cumspectè expendatur, non potest non Diagnosi, Pro-
gnosi, Therapia, Empiria, undique multum decipi,
imò si paulo præcipitantior fuerit, turpiter sese dare Me-
dicus.

Practicam itaq; hanc considerationem eligimus,
pro exercitio Inaugurali; quam ut non modo condignè
evolvamus, sed etiam aliquid usus Arti nostræ inde
eveniat, divinam benedictionem supplices
imploramus.

MORBI HABITUALES

QUID SINT,

Appellatio *Habitûs*, vel inde è
 ſcholâ, & è vulgaribus categoriarum claffibus, adeò
 nota eſſe nobis videtur, ut vel ipſa inutilitate odioſa
 eſſe poſſit prolixior de ipſâ ſermocinatio. Sufficit dicere, quod
 idem ſignificet atque vox *conſuetudo*: Nimirum *promptitudinem*
 aliquam ad *agendum* vel *patiendum*, à *longo tempore*, *multiplici a-*
ctu, & *majori indies Habilitate & Agilitate*, potius *augſcentem*,
 quàm *decreſcentem*.

Morbi verò nomen, ſumimus hoc loco, libertate non te-
 merariâ, *latius*, pro quâlibet *paſſione*, ſive *partium* ipſarum *ſub-*
ſtantiam, *crâſim*, *conſiſtentiam*, *ſtructuram*, *connexionem*, afficiat:
 ſive *Actiones* ipſarum concernat, quæ vulgò *Symptomata* ap-
 pellant.

Licet enim verum hoc ſit, quòd, quando aliqua *pars* læ-
 ditur, eo ipſo utique ad *actionem* illam, cui deſtinata eſt, ine-
 pta reddatur, eâ proportionem, quantam læſio ipſius infert &
 abſolvit; Ut adeò hujus generis læſiones *Actiõnum*, ſummo jure
Symptomata appellentur ex eo, quod ſimul cum *partis* ipſius læ-
 ſione accidant. Cum tamen nequaquam unicè verum hoc ſit,
 quod nulla *Actio*, niſi ſolùm ita à *poſteriori*, à *partium* vitio læda-
 tur; ſed nimium quàm frequentia ſint ejusmodi vitia, quæ à
priori, ab ipſius *actionis*, imò verò ab *Agentis*, vitio, pendeant,
 & circa iſta externa actionis requiſita, *Tempus* incipiendi, *Gra-*
dum impellendi, *Proportionem* cum ſubjecto, *Directionem* ad ef-
 fectum, *Intentionem* ad finem &c. verſentur; & minimè tantum
 à *materialibus* corporalibus cauſis, quàm *immaterialibus*, *inten-*
tionalibus, concitentur, exaſperentur, perturbentur: ſanè ſum-
 mum juſ ac fas eſſe cenſemus, à *ſtriçtâ* ſymptomatum appella-

tione, hujus generis casus excipere: Imo verò, cum valdè numerosi sint, & præcipuè in præsentì nostro negotio, multas tribus ducant, tantò justius sanè fuerit, ut hâc libertate utamur.

Tantò magis vero, dum hæc species *actionum læsarum*, quæ ita velut à priori turbulentiam motuum concitat, immensum quantum in negotio *habitus* seu *assuefactionis* morbidæ, contribuere soleat; Dum vel *leviorem* læsionem partis, *gravissimâ* perturbatione *Actionis*, nimium quantum ante vertit: Vel omninò ubi nulla *partis* materialis dispositio apparet, efficacissimas & præsentissimas *Actionum* debitarum læsiones introducit.

Ut enim taceamus notissimam illam, præsentissimam, & certissimam, alterationem *Motus Vitalis principalis*, *pulsus*, in corpore quantumlibet exquisitè sano, certò & perpetuò ingruentem, imò irruentem, illo statim momento, quo ex *Ira*, aut repentino *Terrore*, citrà ullam corporis alterationem aut molestiam, *Animus* solum concussus est: Frequentissima certè & notissima sunt exempla *Epilepsie* à gravissimo *terrore*, sine ullo alio probabili vitio corporis: *Lipothymie*, ab eâdem nudâ gravissimâ perterrefactione: Imò ejusmodi pathematibus, diu, gravissimè agentibus, ex opinione *Spectrorum* in conclavi obversantium, metu ab animalibus *furiosis* &c. in subjectis *Animo* tantùm timidiore præditis, die sich es nicht aus dem Sinn schlagen können/ talia & graviora, & diuturniora, & frequentius recurrentia, *Actionum* turbatarum pathemata per frequenter evenire, plus quàm notissimum esse censemus.

Sint itaque *Morbi* hi *Habituales*, omnia illa, siue *partium* siue *Actionum* pathemata, quæ siue *partis* alicujus vitio difficillimè emendabili, in diuturnam veluti *consuetudinem* abeunt, & patienti veluti domestica evadunt, ut magis magisque prævalente noxâ & partis deturpatione, vix ejici sese deinceps sinant: siue ipsius *Actionis* prædominante *perturbatione*, absque ulla, aut ad minimum *proportionatâ*, *partis* alicujus læsione, hanc eandem modò dictam promptam & frequentem recursionem consvescant.

CAPUT II.

MORBI HABITUALES
QUALES SINT.

Qualesnam Morbi, *habituales* sint vel fiant? si quæritur, sciendum antè omnia est, quod *habitus*, sive ut ita loquar, *habitualitas*, verbò *Assuetudo*, non quidem specialissimam prorsus differentiam constituat, ita ut morbi, *habituales*, à reliquis totà *specie* differant: sed sunt solum specierum variarum certus *modus*, qui istis quasi super accrescens, specialem *mutationem* ratione *Temporis* & *moris* iisdem infert.

Sunt verò non modo de *chronicorum* Morborum censu; sed etiam *Acutorum* aliqui, eò nimirum sensu, quo jamdum *Hippocrates* lib. περὶ σαρκῶν, Febres *intermittentes*, & ex his nominatim *tertianam*, *acutum* morbum appellavit: siquidem & *tertiana* ac *quartana*, & ipsum *Erysipelas*, *pyretodemotu* perquam notum, ad *habituales* repullulationes non rarò neq; obscurè alludunt.

Frequentissimi tamen, qui hunc genium induunt, sunt utique *chronici*.

Sunt verò *habituales*, sive *statu* sive *motu*. *Statu*, dum perpetuâ & durabilissimâ *pertinaciâ*, sine ullâ perfectâ *cessatione*, ita obsident Patientem, ut velut *inquilini* facti, & jugi afflictione eundem infestent: *Motu*, dum interdum quidem cessant, & illud quidem nonnunquam ad satis longum imò longissimum, tempus: datâ tamen occasione, interdum etiam satis *levi* & *frivolâ*, mox *recrudescent*, & gravissimâ sæpè numero exagitatione, *Corporis* & *Animi* vires afficiunt.

Ubi quidem statim notamus, quòd hæc circumstantia, nempe *Motuum* morbidorum *habitus* seu *Assuetudo*, sit præcipuum illud, quod *habitualium* Morborum molestiorem seu graviorem atque pertinaciorē speciem constituit: Adeò quidem, ut expressius loquendo, *habitus* sive *Assuetudo* morborum, propriè
in

hoc ipso, nempe in perversa *Motus* eorundem *agilitate*, perti-
naci *duratione*, aut promptâ *reversione*, fundetur.

Unde si genericè, & quadantenus *scientificè*, Morbos hos se-
cundum classes suas recensere oporteat, enumerandi erunt sub
tribubus *Motuum Humorum*. Sin autem *catalogum* saltem ipso-
rum texere velimus, suffecerit, etiam vulgatissimâ methodo,
saltem juxta seriem & *positum partium* corporis, *Indicem* illum
concinnare.

Utrumque faciemus quasi sub eodem schemate, ut ita,
quod quisque vult, facilè inde arripere queat.

Qui à *Motu intercepto*, aut variè *interverso*, *contumaciter* fo-
ventur Morbi, adeoque diutissimè *insolenscendo*, veluti *stataria*
passione afficiunt *Ægrum*, sunt vel *Ulcerationes* variæ; vel *Scirrhi*:
vel *Excrecentie*: vel malæ *conformationes*, ab inconvenienti *con-*
solidatione Vulnerum, *Fracturarum*, *Rupturarum*, *Erosionum*, *Luxa-*
tionum, *Distorsionum*, vel *occallescentiæ*, & *Obrigescentiæ* partium
alias *sensilium*.

Qui verò à *motu aucto*, aut inordinatè *depravato*, aut ni-
nimium *neglecto*, dependent, sunt partim *sanguinis*, partim
lymphæ & *seri*, consvetorum *Motuum* modò *exacerbationes*, mo-
dò *omissiones*, modò *intempestivæ* repetitiones.

Et quidem maximè, circa partes atque loca aliàs con-
sveta & *ordinaria*, *Caput*, *Pectus*, *Abdomen*, *Uterum*, partes hæ-
morrhoidali Motui, *Urinæ* etiam, deservientes.

Motibus nimirum, tum *sanguineis*, *congestionem*, & tonico-
spasmodica *compressione* sanguinis, versùs & circa hæc partes,
ad *Hæmorrhagias* ut plurimum spectante, ad minimum in ini-
tio, & sub primis hujus generis moliminibus: Tum *seroso-lym-*
phaticis, quos vulgò *catarrhos*, *diarrhæas*, *Diabetes*, *Fluorem al-*
bum *Mulierum*, *Manationes* ulcerum, *Sudores* frequentes,
spontaneos, aut *labore* provocatos, vel *arte* elicitos, observa-
mus.

His nominibus eveniunt circa *Caput*, *Hæmorrhagiæ nari-*
um; aut ubi hæ non æque perrumpunt, *Dolores Capitis* modò
an-

antici, modò postici, modo alterutrius lateris: Ophthalmici oculorum rubores, aut palpebrarum Inflationes, Ardores, Pruritus, Ulcerationes & Squamosæ abscessiones: Aurium dolores, Tinnitus, & strepitus, Parotidum tumores, inflationes, inflammationes, Suppurationes: Erysipelas Capitis aut faciei. Et hæc quidem de sanguineo censu.

E Lymphatico - catarrhali profapiâ, variæ faciei & reliqui capitis, scabiositates, lippitudines oculorum, Coryza & Grævedines, Visus & Auditus hebetudines, Narium & Oris sputatorie redundantia, illæ puerili præcipuè Ætati familiares, hæ adultæ & juvenili, hypochondriacæ dispositioni vulgò assignatæ: Tonsillarum tumor & faucium, atq; Ulvula, cum mucosis, & sputatoriis symptomatibus.

Infrà Caput, Anginosa inflatio, & inflammatio faucium; Sputum cruentum, & Hemoptysis; Siccæ Asthmata semestria, verna & Autumnalia: Asthmata spasmodica, per paroxysmos insultantia: Tusses diuturnæ siccæ, modò parvæ, modò violentæ & efferæ: Palpitatio Cordis.

Ibidem, à catarrhali causa, Raucedines, tusses humide, Asthmata humida, Phthisis. Singultum quoque Diaphragmatis intuitu, his accensere, nemo credo vetuerit.

In Ventriculo, Vomitiones frequentes; flatulenta, tum ipsius, tum intestinorum, pathemata, quæ hîc quidem, Cardialgias suffocativas, Ructus, Anxietates & Angustias: Illic, varios torminosos Affectus, borborygmus, volutationes, globorum veluti motitationes ibidem, inducunt.

Pertinent huc in muliebri Sexu, tum ordinarius Mensum motus, tum variæ ejusdem anomalix; fluoris albi supra citatum pathema.

Diarrhœæ quoque variæ, præcipuè spontaneæ, non tam immediatè ab assumptorum vitiis, quàm nunc & tunc, præcipuè verò verno vel autumnali tempore, evenire solitæ.

Affectus spasmodici antè omnia, Convulsivi æque, Epilepsia, atque vibrativi, arthritici, gonagrici, chiragrici, podagrici: Ar-

thritis *vaga*, *paralysis* vera & spuria, ut & *spasmodica* multa, *Scorbuto* adscribi solita, pathemata: *Nephritica* passionēs, *Oedematosi*, pedum, & reliquorum artuum, *tumores*, noctu quidem subfidentes, per diem verò recrudescentes.

Erysipelas item, certis partibus *frequentius* incumbens.

Denique *Hæmorrhoides*; Apud alios *internæ*, apud alios *externæ*: & hæc quidem jam *fluentes*, jam *cæcæ*, *turgentes*, aut cum dolore *tumentes*.

In his omnibus, similibusque, adhuc aliis, præcipuè *externis*, ut *herniis*, uteri prolapsu, *scabiosis* efflorescentiis, aliisque *Apostematibus* recurfantibus; respiciendum maximopere est, quantum *specialem* hanc nostræ considerationis *formalem* circumstantiam induerint: quod quidem, quò magis fecerunt, eò magis sunt nostræ considerationis.

Et quò *diutius* tali modo egerunt: Imò verò adhuc magis, quo *frequentius* actum suum hujusmodi repetierunt, eò *conu- macius* deinde insistent, eò *certius* redeunt, eò difficilius mitescent & desvescunt.

Verbo, omnes & singuli supradicti morbi, *affvesiunt* perfacile; eoque ipso spectant, *in genere*, utiq; ad hunc nostrum censum: *specialissime* verò & eminenter, illos præcipuè è dictis, notatos hic volumus, qui jam valdè *insolescentes*, insignem *agilitatem* ad revertendum, & *habilitatem* ad insistentum, induerunt, *sæpius*, *graviter*, *pertinaciter*, infestant.

Hi enim, cum plurimum differant ab aliis ejusdem generis, jam solum primà vice, & à *manifesta* aliquâ, atq; crassiore *corporali* causâ, inductis atq; sustentatis; Adeoq; tam in *Prognosi* quàm *Methodo* curandi, ab istis admodum discrepent: Propterea etiam in *Diagnosi* benè inter se invicem discerni merentur.

Possumus autem paulò latius, tales nostræ considerationis Affectus, complecti, dicendo, quod maximè spectabiles, & nostræ acceptionis, sint *habituales* Affectus, qui totam aliquam corporis *Regionem*, *cavitatem*, seu ut vulgò dicunt *Ventrem*, ita oblidant, ut *sæpius*, aut *statis* veluti temporibus, ibidem

bidem repullulent : aut *pertinacissimè* inhærescant , & diutissimè partem obsideant. Sive jam *totam* illam Regionem , sive unam aut alteram ejus *partem* , infestent ; Eamq; , vel *grandiorem* , aut ejus Regionis *præcipuam* : aut *modò hanc modò illam* ex ibidem stabulantibus : sive immediatè inter se , per nervos atq; vasa , *conjugata* sint , sive tantùm generaliter , ipso *situ* atque *loco* , *con-*
nexa , sive comprehensæ.

Unde præcipuas hujusmodi passiones designare possu-
mus , varios *dolores Capitis* & *circà Caput* ; varios ejusdem in-
farctus , *Catarrhales* , *ulcerosos* , *tumentes* , ad *fauces* quoque &
pectus sese diffundentes , vulgò *Flüßigkeit* / der Patient sey treff-
lich zu *Flüssen* geneigt / es fallen Ihm die *Flüsse* so häufig &c.

Intra *Pectus asthmatica* & *tussiculosa* , diuturnæ , aut perfre-
quenter , & levi occasione recrudescentes , passiones : dicunt
vulgò der Patient sey so zu *Stech-Flüssen* geneigt.

Exteriùs , *circa Nucham* & *cervicem* ; & quidem alterutrum
ejus *latus* , frequentes *tensivi* , *pressorii* , imò quasi *contusorii* , do-
lores : quos vulgò *Rheumatismum* nomine denotant , Es sey ihnen
ein *Fluß* in den *Nacken* gefallen / daß sie sich davor nicht rüh-
ren / nicht umsehen können. *Dolor* similis modò quasi *contuso-*
rius , modò *vibrativus* , *Ziehen* / *Zucken* / *reißen* / imò ut minùs
diserti graviozem hujusmodi *pressionem* exprimunt , Es lebe al-
les drinnen : *Asthma* quoq; *spasmodicum* (quod in Praxi , ut fa-
miliarissimè obvium est , ita certè melius distingvi summo jure
meretur ,) ab *externo* non modò *pressionis* , sed etiam *contuso-*
rii doloris sensu Patientem infestans , persæpè etiam in *lancinato-*
rios dolores diuturnos , neque sine febriculâ , excandescens ,
vulgo *Pleuritidis nothæ* nomine : item affectus *asthmaticus* , cum
ejusmodi sensu in & sub *scapulis* , *Hæmoptyses* recurrentes ,
Phthisis.

In *Abdomine* , *hypochondriaco-colica* utriusque *Sexus* , & *hy-*
sterica feminei in specie , symptomata. *Nephritica* passiones
specialissimè verò *calculus*.

Inde omnis generis *arthritica* , *ischiatrica* , *gonagrica* , *podag-*
rica , *varicosa* , Pathemata.

Spasmodici Affectus exterioris corporis, præcipuè verò prorsus *convulsi*, si à *chronicâ* causa, aut gravibus *Animi* commotionibus oriuntur, faciliè in *habitum* transmigrant.

Internarum quoq; partium *spastica* concussiones, non raro eodem tendunt, ut *Vomitus* post pastum, post pingves cibos; *colica* tormina post frigidum potum, aut leviter sæculentum: *Diarrhææ*, post similia: *Singultus* quoq;, *Cardialgie suffocativæ* sæminarum quarundam, post *dulcia*, *acida*, *suaveolentia*.

Imò verò ipsæ *febres*, minimè extra hunc censum sunt, præcipuè tamen *intermittentes*. Induunt verò *habitum*, modò ab ipsa longâ *duratione*, ut deinde non faciliè amplius cessent, licet maximè vel *nulla* amplius, vel certè non *proportionata* supersit *materia*: aut vertente *anno*, idque sæpè exquisitissimè, ad *dierum* usq; numerum, recrudescent: & hoc ipsum non *unò* saltem annò, sed *duobus*, *tribus*, deinceps.

Specialissimum exemplar *habitualium* Morborum, sunt illi, qui vel à *Phantasiâ* Matris perversâ, *Sympathiis* vel *Antipathiis* phantasticis, ortum duxerunt; vel *hereditariâ* transmissione, in hominem derivati sunt.

CAPUT III.

MORBI HABITUALES UNDE SINT.

P*athologia* Morborum *habitualium*, fundatur partim in ipsa partium substantia, consistentia, continuitate, *structurâ*; partim in *Motu*, *Actuatione*, usu, seu instrumentali actione earundem: Nempè in *mobilitate*, & actuali administratione *Morbus*.

Quamvis autem *dispositio* partis, per aliquam substantiæ, consistentiæ, *structuræ* ejus, durabilem læsionem introducta, per frequenter ad *habitum* morbidum inducendum concurrat; vix unquam tamen maximam partem totius *Ætiologiæ* absolvit, nisi tantum in *stataris* seu *inveteratis* Morbis.

Nimirum *diutissima* quoque *deturpatio*, *destructio*, *interceptio*, *structura* partis, *restorationem* ejusdem difficiliorem, languidiorem, & *flaccidiorem* post se trahit: Interim nequaquam dubio caret *speculatio*, utrum hoc puræ *substantiæ* partis, & annon potius *actui* constructionis, *Energia*, promptitudini, ordinatæ & scitæ intentioni AGENTIS seu STRUENTIS, tribui debeat. Et sanè vel leviter attendendo, pro affirmativa cadet Judicium.

Quicquid autem hujus sit, certum in nostram rem hoc omninò est, quod hujusmodi *partium* læsiones, non æquè aliorum, quam *statariorum* Habitualium Morborum causæ, facile fiant; Aut, si *recurrentium* Pathematum quiddam foveant, *proportio* certè materialis hujus causæ, neq; *tempori*, neq; *gradu*, neq; subinde *Speciei Motus*, rectè respondet: Imò frequentissimè ne ipsi quidem *loco* immediatè affecto, obtingit atque evenit ille *motuum* perversus *habitus*.

Et tales quidem, qui à *Motus habituali* exacerbatione, perversione, intempestivâ concitatione, aut neglectione, pendunt, *Affectus habituales*, immensum quantum *frequentiores* atque communiores existunt.

Inde etiam præcipuè est, quod pleriq; hujusmodi *Affectus*, nullâ re citius, & gravius exacerbentur, quàm *animi pathematibus*, aut *sensus* irritationibus, etiam satis *levibus* & tene-rioribus.

Et hoc quidem de *Ætiologiâ* horum *Affectuum generalissimâ*; ad quam etiam de cætero, *in genere*, notare convenit, quod *consuetudines* in corpore humano, propriè & quasi unicè circa *Motus* versentur: Adeoq; hic etiam illud ipsum, quod principaliter affvesit, nihil aliud nisi *Motus* sit.

In specie verò, & quantum ad plerasq; allegatas *habitualium Affectuum* *Ætiologias* attinet, sciendum est, quòd iidem præcipuè consistant in ejusmodi *Motibus*, qui vel magis immediatè *propter* humores certos promovendos suscipiuntur, vel actu in talium *congestionem* consistunt.

Sunt vero hujusmodi humorum *propulsorii* & *congestorii* motus, vel magis *ordinarii* & solenniter consueti; vel planè *extraordinarii* fortuiti, & quasi violenti.

Priores, innituntur *excretionibus* sanguineis, secundum certas *ætates*, ad certas corporis *Regiones* dirigi solitis.

Posteriores, fundantur in *violentis* quibusdam effluxibus, aut ad minimum affluxibus; Quando nempe per *Ulcerationes*, sive fortuitas, sive artificiales, (*fonticulos, setaceum, vesicatoria*) aut sanguinis emissiones, *Vena sectiones, Scarificationes*, emissio per certam partem ita assuevit, ut inde impostèrùm, quando aliquid excretionè dignum denuò in corpore oberrat, ad illam eandem *partem, locum, & speciem* excretionis, fiat molimen.

Ubi quidem, tertio loco, maximopere notanda est, *composita* illa horum *habitualium Motuum* species, quando ista magis *spontanea* seu quasi naturalis determinatio, ad certam *speciem, & certa loca* excretionis, vel statim coincidunt, vel ad minimum successivè ad eundem terminum devolvuntur.

Ubi v.g. *Annosioribus*, è qualibet occasione, etià leviori, perfacile *congestionès, Dolores, Ulcerationes, Tumores*, circa *inferiores* partes corporis, *Renes, Lumbos, Coxas, Femora, crura, Pedes*, prognascuntur, pertinaciter durant, frequenter repullulant, præ *junioribus*. Uti contra, *junioribus* longè faciliùs circa *Pectus, Thoracem, Hypochondria*, passionès ejusmodi assuescunt, quàm aliis *Ætatibus*. Tantò magis verò hoc, ut denuò monemus, si *externæ* ejusmodi dispositiones, cum *internis* concurrant atque conspirent.

Cum itaq; istæ veluti solennes *excretionès Sanguineæ*, primâ ætate ad *Caput & Nares*, tendant; Succedente *Adolescentiâ & Juventute*, ad *Fauces* atq; *Pectus*, deniq; *Hypochondria*: Procedente *juvenili, & virili* seu *consistente*, *Ætatis* serie, ad *Hæmorrhoidales & Mictus* sanguinei expulsiões: Fit inde, ut hujusmodi *Ætatibus*, *excretio actualis*, à qualibet *externâ causâ* facile exstimuletur; aut licet ipsa *exitum* non fortiatur, *molimi-*

nam tamen ad ipsam spectantia, non modò semel, sed etiam imposterum, suscipiantur, & magis magisque insolescant, seu veluti solennifentur.

Interim hoc utique certum, neque quidem conceptu difficile est, quòd, quò *diutius*, aut *sæpius*, aut *vehementius*, *Motus* tales ad fluxionem spectantes exacerbati fuerunt, aut actu ad *exitum* pervenerunt, eò *certius*, *citiùs*, & *pertinaciùs*, in *habitu* abire soleant. Neque id solum in præsens, sed etiam, eòdem statu atque habitu continuare; adeò, ut licet *Ætas* talis succedat, quâ ordinariè consuetus *Motus* ad alia *loca* devolvi debuisset, nihilominus è longâ assuetudine, *primum locum* fervet, nimirum *prægressæ* alicui ætati familiarem, licet *præsenti* minus convenientem.

Eodem tamen tendit etiam *Palindrome* quælibet, etiam à magis fortuitis causis, aut ad minimum è *vicina* *Ætatis* dispositione, in aliam conterminam, prognata. Ubi v. g. satis frequentes sunt in *Senibus*, ejusmodi regurgitationes humorum, ab inferioribus partibus, *hamorrhoidibus*, *cruribus*, *pedibus*, ad *Caput*: è quibus *Vertiginosi*, *Apoplectici*, *Visus* modò debilitatorii, modò everforii, effectus, prognascuntur: Licet magis ordinarius & immediatus *recursus* inde tantum, ad *Hypochondria* fieri deberet. Quemadmodum etiam dissimulandum non est; Quod utiq; etiam in talibus casibus modò dictis, hæ ipsæ quoq; *hypochondriacæ* *Palindromes*, vix unquam absint, sed perpetuò cum istis concurrant.

Tota itaq; *Pathologia Habitualium* ejusmodi *Morborum*, consistit in eo, quòd (1) aliqua *Assvessatio* *Motus* facta sit in genere, (2) ad certum *locum* in specie: & quidem (3) *Materiæ* alicujus, vel immediatè vel mediatè *noxia*, aut ad minimum *molestæ*: Sive locus ille, (4) è genericâ quadam, *communi*, sive ex individuali prorsus, dispositione, ad hujusmodi motum *agilior* factus sit.

Ut *Exemplis* negotium clariùs fiat, dabimus aliqua, quibus & *historiam*, & *Pathologiam* horum *Affectuum* illustrare liceat.

EXEMPLA.

Vir juvenis 24. annorum, perillustri profapia, adeoq; ad libertatem quamlibet non magis pronus, quam promptus, cum in Adolescentiâ sua, præter ordinariam *vinosam, opiparam, diætam*, largis quoque *compotationibus* indulgere cepisset, *vinum generosum, Aquas vitæ* quas vocant, *tabacum*, per frequenter ad *ebrietatem* usq; ingereret; Prætereà excursionibus *venatoriis, Itineribus* repentinis & longinquis, per *imbres, tempestates, ventos, grandines, nives*, tenerrimis fericeis vestimentis levissimè indutus, vacaret: *Venereis* quoque rebus non parum sese manciparet: Incidit dehinc in fortuitum infortunium, ut casu ab alto *Caput* quidem leviter, *Animum* vero gravissimò terrore, concuteret, ut per aliquod horæ minuta, vix rectè ad se rediret.

Intervenientibus mox aliis, moralibus *langvoribus, tædiis, iracundiis, terroribus*, antè omnia vero *diætæ* liberioris in strictissimam mutatione, incipit *gravedine* quadam, *tensione* circa summas *nares, frontem, Verticem*, cum multa *mucidissimâ* excreatione, *tinnitu aurium, Vertigine, ructibus* post pastum, affici, de cetero satis benè valens.

Continuat hæc scena in tertium annum. Sub quorum decursu, propinantur numerosissima & copiosissima medicamenta; modò *cephalica*, modò *stomachica*, præcipuè *martialia* multa, modò *nervina*, modò *salia volatilia*: *Acidulæ* etiam *E-rane* usurpatæ, sed cum mox primò intemperantiore usu, gvaldè turbarent *ventriculum & alvum*, simulquè, *Vertiginosò* effectu, *Caput*: citissimè cessatum est.

Appetitus interim constabat optimè; *Somnus*, erat & promptissimus & profundissimus: *Corpus & Animus* nunquam melius, quam in *Equitatione, Venatione, Itineribus, fatigationibus*, habebant.

Inter *Consultationes* Medicorum accedebat unus, qui gravissima quæquæ ominabatur, *Apoplexiam* ante omnia præsentissimam. Cujus metu ita exagitabat illustrem Patientem, ut non modò ad sua consilia, medica menta, & varias dispositiones, & modò non imperia, eundem permoveret: sed etiam eò desperationis adigeret, ut quotiescunque *aures tinnirent*, *Vertigo* emicaret, aut *mucus* ad sreatum difficillimè succederet, mox panico terrore, & veluti jam instantis *Apoplecticae mortis* formidine extrà se positus, *Lipothymias* frequentissimè velut in procinctu haberet.

Desperabundus de omni *Theoriâ* Medicus, saltum deniq; faciebat ad *Venerearum* passionum suspiciones, & jam non modò proposuerat, sed ferè ad rati habitationem perduxerat, *salivationis* curam; cum superveniens alius Medicus, pensitatis sollicitissimè omnibus circumstantiis, & semotis istis pathematib9, quæ ab *Animi pathematibus*, metu, terrore, interdum *Iracundiâ*, pendebant: Sepositis vitiis *temporariis*, quæ à *diætæ* abusibus proficiscebantur: consideratis verò magis *perpetuis*, *constantib9*, & *uniformibus*, symptomatibus, nihil nisi hoc unum enunciavit: Affectum illustris Patientis nihil aliud esse, quam *Catarrhum*, imò in specie *gravedinem* atq; *coryzam* HABITUALEM. Reliqua omnia symptomata, non nisi purè *fortuita* esse, & antedictis *moralibus* magis causis, aut *diætæ* vitiis; inniti. *Apoplexiæ* metum, non modo *Ætati*, sed & omnibus aliis circumstantiis, non magis *ἀτοπον*, quàm *ἀλογον* esse: *periculi* nihil, sed tantum *diætæ* aliqualem circumspectiorem rationem, necessariam esse: Eamque in *potu* potius relaxavit, & cum hætenus *vini* usus, à *cunis* propemodum patienti huic consuetus, nullo rationali consilio *absolutè prohibitus* fuisset, eundem, modò *moderatum*, iterum svasit, fercula solidiora, loco *mollissimorum* jurulentorum, hætenus injunctorum, (quæ & *fastidio* erant Patienti, & *ἀδδύ-Φαγίαν* Patientis nullomodò satiabant, imò *colliquatoriâ* mucescentiâ Ventriculum prægravabant) substituit, occupationes, *Motus corporis*, *Animi libertatem* quantamcunq; fas est

C

lau-

davit, à frivolo verò abusu multorum & variorum Pharmacorum, Dominum Patientem potius abduxit. Ita ille, inde, & licet hæc omnia longissimè infrà mediocritatem observaret, nihilominus *vegetus, robustus, alacris, vivax*, jam per 12. annos, etiam extrà somnium de *Apoplexiâ*, vixit: sed & inter aliquot Ipsi addictorum Medicorum, etiam istius intempestivi Ominatoris, jam antè aliquot annos funus vidit. Nulla interim alia re, nisi sola illa *gravedine HABITUALI*, inter evidentissimas *Aëris, mensæ, motus, quietis, Animi pathematum*, & quas notare nostra nihil refert, ataxias, nunc & tunc vexatus.

Fuit hic *catarrhus Habitualis*, tantisper, & quamdiu legitimè procedit, & evacuatur, nihil adeò periculosum involvens: Si verò temerè *conturbetur, irritetur, exacerbetur*, proclivis utiq; erit in graviora mala, à quibus hætenus, præcipuè per *Ætatem*, nullum fuerat periculum.

Adolescens 17. annorum, habitus corporis valdè *teneri*, sed tamen *proceri*, diætæ lautioris & vinosæ, *cholero-melancholici* habitus, avitâ dispositione hæreditatiâ ad commotiones *sanguinis*, & *phthisico-hecticas, spasmodicas, podagricas* passiones propendens: Cum inde à pluribus annis frequentibus & largis *Narium Hemorrhagiis* obnoxius fuisset, ante aliquod tempus, *medicamentis fluxum hunc restringentibus, externis & internis*, ab *hemorrhagiâ* quidem *Narium* liberatus est: Cum verò *Vernum* tempus rediret, *tussi* corripì cœpit, *siccâ*, sed *efferrâ*: Cum excessum aliquem in computatione *vini*, & quidem *generosi, & aquarum vitæ*, quas vocant, iterato comitteret, rectâ in *phthisin* transiit; variis methodis, modò *dogmaticis*, modò *empiricis* frustraneis, solâ morte terminatam.

Atque ita *hemorrhagia hæc habitualis*, quæ vel sine periculo diutiùs tolerari potuisset, vel quolibet tempore, ubi, infestior facta, oneri esse, & jure suspecta fieri meruisset, levi *tempestivâ venæ sectione*, non modò ad diuturnas, sed planè *pereennes*, inducias redigi potuisset, intempestivâ hac *suppressione*, si-
ne

ne ullo respectu ad *habitu*, promptè fanè in aliud genus, & plurimum deteriore affectum, transiit.

Fæmina generosa, *habitus cholérico-melancholici*, in juventute sua, circa *mensum* successum varias difficultates perpeffa, & ea propter *frequentibus*, intempestivis, & *immoderatis* *Vena sectionibus* abusa, cum posthac viro nupfisset, & aliquoties peperisset, adeoque *lochiis* satis largiter evacuata esset, non modò *Vena sectionis* omisse hætenùs, nulla damna sensit, sed etiam *mensum* successum, licet minùs *ordinatum*, non tamen præter modum *infrequentem*, habuit. Cum vero 30. circiter annò *parere* desiisset, cœpit circa *Pectus* malè habere, *Asthmate siccò*, *tussi sicca*, infestari. Adhibita medicamenta *pectoralia*, discutientia, balsamica *calida*: Cum malum nihil remitteret, imò increbesceret, nata suspicio *phthiseos*, adeoq; remedia eò destinata *traumatica*, *adstringentia*, in frequentem usum deducta. Cum à talibus statim ad sensum pejus haberet *Ægra*, ad *expectorantia* & *humectantia* factus transitus. Hæc cùm *rarò*, & *moderatè*, usurparentur, processit cum *tussi sputum*, sed sine ullo levamine *Asthmatis*, impetus *tussis*, *inappetentie*, *lassitudinis*, *sitis*. Durabant ejusmodi passionès ad 10, 12, septimanas, per hyemes, per autumnos. Exacerbabantur *Irâ*, *terrore*. *Menses* rarius rariusque succedebant. Cum hic status ultra 4. annos durasset, post alios Medicos, unus denique jussit *Vena sectiones* reassumere. Videbatur *macies* summa Patientis, dissensui aliorum Medicorum pollicem premere: obtinuit tamen deductio Medici plausibilis, & aliquot exempla aliorum, cura ipsius summoperè sublevatorum. *Mittitur sanguis*, subjunguntur lenia discutientia, resolventia, attenuantia, subjunctis tempestivè tonicis, è *salium volatilium* urinosorum censu. Cavendo tamen à *frequentibus*, aut *copiosis*, medicaminum exhibitionibus.

Hæc Methodo non modò revocati, sed propemodum in *ordinem* redacti sunt *menses*; delinitus maximopere est *Affectus*: *Patiens* tolerabilissimè habuit, & à *frequentibus* & *gravibus* ejus-

modi, ante omnia verò *diuturnis*, insultibus, penè libera vixit per tres annos.

A *levamine* hoc, ad plenariam *sanitatem* aspiranti, neque mediocri hujusmodi Valetudine contentæ, ut ferè fieri solet, supervenit novus Medicus; causatur *tenacissimum* mucum Pulmonibus Patientis inhaerentem, quem *emollire* & *expellere* necesse sit: *Venæ sectionem* explodit, & summoperè adversatur, præcipuè solennissimò illo dicterio, (quod à solis *vetulis* didicisse Medicos, Sibi perſuadet D.D. Præſes) *Sie solte sich lieber Blut in den Leib fauffen* / deterret Patientem ab ejus repetitione, quam illo mense *Septembri* celebrare, per hos *tres* annos solita erat. Substituit Ille potiùs sua Methodo, decoctum *pectorale expectorans*, in quo *Glycyrrhiza*, *jujuba*, *Sebesten*, omnem paginam absolvebant. Incipit inde Patiens *angustiâ pectoris*, & *Asthmate humido* impetuosissimo obrui, quod à *catarrho suffocativo*, nullâ alia re, nisi impetuosissimâ *tussi* conjunctâ, differebat. Materia quam *tussiendo* emoliebatur, primò quidem erat paucior & *tenacissima*; mox verò, cum *decocti* largam quantitatem quotidie assumeret, copiosior, non tamen multò *volubilior*. *Angustia pectoris*, *tussis* diuturna ferocissima, *expectoratio* copiosissima, nullus ferè *somnus*, *concussio* Capitis à perpetuâ *tussi* violentissimâ, imò totius corporis *delassatio*, longè minus tamen pessundare videbantur Patientem, quam *Febris hectica* impetuosissima, præcipuè *tertiâ pomeridianâ* horâ exacerbari solita. Cum hæc ita in *tertiam* septimanam continuassent, incepit *purulenta* *tussi* rejicere; *Viribus* verò indies ita decreſcere atque fatiſcere, ut ex omnibus ipsam videntibus, nemo ferè quicquam aliud, quam *Mortem* ejus expectaret: Nemo tamen omnium, sive certius, sive præſentius eandem ominaretur, quàm ipse *Medicus*: Qui quidem proinde *prognostico* formali, Maritum præmonebat, & funus Conjugis, quasi ad interim, apparare juberet. *Patiens* illo lecto, quod sub initium hujus curæ occupaverat, velut immobiliter affixa, per integras *viginti sex* septimanas affixa

affixa permanfit; & toto hoc tempore, *ſingulis diebus* ultrâ *duas libras* mucofi ſputi, tuſſiendo rejecit, *tusſi* effera, *calore* febrili contumaciſſimo, *inappetentiâ*, *vigiliis*, ſummâ *virium* inopiâ, *conſumptione* corporis extremâ, jugiter perſiſtentibus.

Commodum evenit, ut abſente ſuo hoc Medico, ſub finem *Martii* Menſis, quo tempore alias *Venæ ſectiõnem* vernam celebrare ſolita fuerat Patiens, ſummô manè, *palpitatione cordis*, mox turgeſactione & pullatione inſolitâ vaſorum *circâ Caput & tempora*, corriperetur Patiens, ultra horæ ſpatium; quo ceſſante, obdormiſcens langvidè, ad *nonam* antemeridianam quieſcit: Tunc expergefacta, repentinâ tusſi, & facili, imò præcipiti quaſi ſcaturgine in Os effusâ, exſpuit *quinq;* vel *ſex* deinceps portiones, quantum bucca capit, puri ſinceri *ſanguinis*: Quô accidente, non illa magis, quam domeſtici ejus perterrefacti, curſu accerſunt priorem Medicum. Hic, ſepoſitis inconfultis illis *expektorantibus*, datis *Alexipharmacis* lenibus, *diſcutientibus*, & quaſi tantum odore tenus, ut vocant, *ſuſſendentibus*, enormem illam *expektorationem* ab illo die in poſterum refrenavit, ſputum *ſanguinis* cohibuit, curam tamen ulteriorem, Medico poſt proximum triduum reduci, detulit. Cum verò neque Patiens & ejus Agnati, neque ipſe ille Medicus, in ſuâ Methodo amplius multum fiducia ponerent, conſenſerunt mox univerſi, in priſtinam methodum; quâ cum intra 14. dies omnis ſenſibilis *exacerbatio* febrilis ablata, *Vires* refocillatæ, *quies* quadantenus reſtituta, *appetitus* invitatus eſſet, inſtituta *Venæ ſectio*, poſt exquisitam commonſtrationem, ſatis promptè in hanc ſententiam condeſcendente altero illo Medico, eò redegit totum negotium, ut Patiens non modò è lecto liberaretur, & ipſa tertiâ abhinc ſeptimanâ, in publicum, vehiculo ſuo prodire valeret, ſed etiam totum illum *annum* ita tolerabiliter exigeret, ut non niſi rariffimè, uno vel altero die, lecto affixa hærerè neceſſe haberet. Poſt annum demum, *Martio* Menſe reverſo, cum alius novus Medicus, pariter *Venæ ſectiõnem* timuiſſet, tandem ſuccubuit.

Ita *Asthma siccum habituale*, potius ab *ampliatione* vasorum circa pulmones, & *spasmodicis* moliminibus ad *Hæmoptysin* spectantibus, quàm ullo alio supposito *infarctu*, *Viscositate*, *acrimoniâ* humorum, & similibus commentis; dependens, intempestivis *expectorantibus* irritatum & suffarctum, in præsentissimas noxas transmigravit.

Vir 45. annorum, habitus corporis *sanguineo-cholericus*, mutatione tamen diætæ ad *melancholicum* habitum declinantis, ab aliquot annis, *verno & autumnali* tempore, post aliquot dierum *Asthma humidum & tussim*, *hæmorrhoidum internarum fluxum* experiri assueverat, cum insigni de cætero *euphoriâ*, & *sanitate* satis exquisitâ. Anno 1689. cum sub *autumnum dysenteria* grassaretur, & ex ipsâ ejus *Viciniâ* aliquot funera efferentur, eoque ipso tempore *hæmorrhoides* ipsi expeditè sed *liberaliter* procederent, vano metu, ne ab his in *dysenteriam* facilis fieret transitus, fluxum earum intempestivò aliquot *adstringentium* usu, simul cum copioso abusu *nucis moschatae*, præmaturè suppressit. Cessaverunt, hâc vice, sine insigni incommodo. Subsecutò autem *vere*, maturiùs coorta *tussis* cum *Asthmate* intensiore, graviùs fatigant virum. Consulit Medicum empiricum; qui modò *opiat*, modò *salibus volatilibus*, modo *Regimine* diaphoretico per calidiora, *brevi* sed *forti*, exercens Patientem; cum simul ipsi, ubi de *hæmorrhoidum* assuetudine sibi familiari admonuisset, respondisset, se vel maximè ab ipsis quoque *hæmorrhoidibus*, utpote morbo, eum curare necesse habere: citissimè patientem in *Hydropem* conjecit, qui impetuose prævalescens, ab aliis Medicis contemperatus & leviter sublevatus, post tres tamen quadrantes anni, non nisi morte cessavit.

Ita *Fluxus habitualis* hæmorrhoidum, intempestivè suppressus, incommodè confopitus, & incongruis *precipitibus* diaphoresibus obrutus, in *Hepatis Scirrhum* infarctum, atque inde *Hydropem* pertinacissimum, imò inconsolabilem, transivit.

Persona illustris, Vir 40. annorum, ab aliquot annis laboravit, *ulcere femoris*, ad communes linimentorum, unguentorum, emplastrorum usus, refractario. Supervenit tandem paulò peritior Chirurgus, qui post præviam, quam vocant præparationem corporis, per discutientia, *camphorata & balsamica*, mundificantia, consolidantia, Ulcus ad *cicatricem* perducit, & quod ajunt, ex fundamento, restituit, atque percurat. Habent se omnia optimè ad *annuum* propemodum spatium; ubi obscuris quibusdam *tensivis & pressoriis* doloribus afficitur. Pateriens: Cui, cum ex consilio opponerentur *repellentia* dicta, ne nova fluxio ad partem nasceretur, succedit mox *lassitudo*, quam sequitur *horror*, & hunc *æstus* gravissimus, cum *anxietate* præcordiorum summa, verbò *febris acuta* valdè impetuosa.

Alia Persona, *fœmina*, *Ulcerationem* ejusmodi diuturnam ad 10. annos continuos, in *tibiâ* perpeffa, denique *fabri* cujusdam *ferrarii* medicatione, per *pulverem ex herbis*, quo Ulcus sine externâ speciali applicatione, ab intrâ extrorsum *purgabatur*, *mundabatur*, *restaurabatur*, hoc inquam medicamento, intrâ aliquot septimanas ab Ulcere hoc liberatur. Succedit etiam ita ad *annuum* ferè spatium, illa immunitas, nisi quod circa insigniores mutationes *tempestatum*, molestum aliquem sensum nunc & tunc experiretur.

Post *annuum* verò spatium, recrudescunt graviora pathemata, & frequentes atque gravissimæ, non modò *erysipelaceæ*, sed omninò *phlegmonodes* partis *exæstuationes*, *tumores*, inflammationes; donec denuò in *Apostema*, imò *Apostemata*, circa locum pridem obsessum, denuo abirent. Neque sanè constanter & ex fundamento restitui potuerunt, prius quam ad *sacrificationem*, assuefieri cœpit pateriens, & simul frequentibus *lenibus diaphoresibus*, & præterea medicamentis *sanguinem mundificantibus*, & *temperantibus* subinde usurpatis, à molesto illo, ad hætenus consuetum exitum decubitu seu restrictorio motu, quadantenus desvefacta est.

Imò satis notum est quam pertinaces passionēs, quin sæpè-

pènumero fonticas læsiones , post se se trahat *fonticulorum* diutius gestatorum , & denique temere *resiccatorum* , neglectio.

Ubi nimirum in omnibus hujusmodi Morbis , illud utiq; in sensus incurrit , quod , quando alicui *Motui excretorio* Natura assuefacta est , nempe per promptiorem atque liberiores *exitum* , undecunque ipsi conciliatum atque concessum , quod tunc ejusmodi *motuum* , quatenus plus minus directè ad *Conservationem* Oeconomix corporis inserviunt , imposterum quoque ita memoriter , & pertinaci intentione , recordetur , ut nisi postmodum quoq; , iisdem locis , liberam emotionem retineat , Materia tamen talis maneat , quæ vel ipsis ejusmodi locis commodè expelli posset , vel ad minimum *in genere* , emotionem atq; expulsionem meretur: Tunc utiq; semper denuò ad hujusmodi *emunctionem* expulsionem , *emotionem* , variis *moliminibus* & tentaminibus *motoriis* denuò recurrat , adeoq; longum suum *habitum* , sive Consuetudinem *agendi* , retineat , atq; reassumat.

CAPUT V.

HABITUALIUM AFFECTU- UM LONGINQVA EXTENSIO.

CUM omnium nostrorum laborum , *Observationum* , considerationum , verus atq; unicus *finis* , debeat esse *Praxis* , & quidem non solum ipsa *Therapia* , sed etiam verax & benè fundata *Prognosis* , non possumus proinde , quin hoc caput veluti speciatim addamus , ut nempe ex hac certissima annotatione atque observatione , meminisse detur , quanta vis sit *Habitûs* seu *Consuetudinum* , in morbidis *motibus* in corpore animali.

Cum *Motus* in corpore humano , qui ad *excretionem* & *ex-
onerationem* aliquam , certo respectu non modò *non inutilem* , sed non rarò *necessariam* , spectant , principaliter sint illi , quibus *compressio* , *restrictio* , adeoque *congestio* sanguinis ad certa *emun-
ctoria* perpetratur ; hæc ipsa verò *emunctoria* , secundum *Æta-
tes* varient; Occurrit inde in praxi , frequentissima illa , imò si
at-

attendatur, adeoq; exquiratur, *quotidiana* observatio, quod, quicumq; in aliqua prægressâ *Ætate*, *evacuationi* tali per certum *emuntorium* assueverunt, illi *subsequentibus* *Ætatibus*, ad excretiones ejusmodi alias, pariter proclives existant.

Quando enim *Natura*, *excretionem* aliqua *in genere*, ad usum corporis efficaciter potita est; illa etiam *excretio*, unam eandemq; *rem* concernit: sed *locis* tantum ita variat, ut per diversa loca atque organa, *una* tamen eademq; *materia* moveatur, excernatur. Ibi sanè mirum non est, si ad ejusmodi *Intentionem*, ad excretionem *unius* certæ *materiæ*, *Natura* assuefiat *in genere*, licet *locis* diversa, per alias circumstantias deinceps sibi commodiora, agilia, propinquiora, tunc in usum trahat, adeoque *mediis* solum variet, *rem* verò unam eandemque semper agitet, aut intendat.

Facit sanè hoc, in negotio illo solennissimo, à quò paulò circumspectius loquendo, vix non omnes *Morbi chronici* (quot non ab *externis* causis concitantur) originem suam habent, nempe in *Motibus hæmorrhagicis*, sive *moliminibus* ad sanguinis excretionem spectantibus.

Inde itaque est, quod illi homines, quicumque in *juniore* *Ætate*, copiosis, promptis, & frequentibus *hæmorrhagiis Narium* assueverunt, procedente *Ætate*, vel *Hæmorrhagiis* sive fluxibus, vel ad minimum *spasmodicis*, compressorii & congestoriiis, *Motibus* circa illas partes, obnoxii fiant, quibus *hæmorrhagica* eruptiones, illâ ipsa *Ætate*, fieri possent, aut deberent.

Inde fit, ut quicumque in *primâ Juventute* & *Adolescentia*, *Narium* hæmorrhagiis admodum infestati fuerunt, iidem *succedente* *Ætate*, vel hanc consuetudinem retineant, frequentibus & copiosis *Narium* *Hæmorrhagiis* affici pergant; vel *doloribus Capitis* & *circâ Caput*, *circâ humeros*, *cervicem*, *scapulas*, obnoxii fiant, *Erysipelate* capitis, aut *Ophthalmiis*, *Angina* &c. infestentur: aut succedit proxima *juvenili* *Ætate*, ejusmodi *moliminum* cohors *circâ thoracem* atque *Pectus*, & subnascitur varium *moli-*

men, ad *Hæmopticas* sanguinis excretiones in fundamento respiciens, non rarò etiam perveniens.

Sub *vitâ* verò *sedentaria*, transit hæc *habitualis* ad *excretorios* sanguineos *Motus* dispositio, in *Hypochondriacorum Affectuum* turbam; qui nempè ad *excretionem* sanguinis per *internas hæmorrhoides*, præcipuè respiciunt, & veluti destinati sunt.

Idem fit in *annosioribus*, circa *exteriores hæmorrhoides*; & his minus expeditè succedentibus, circa *Renes*, *lumbos*, regionem *ischiatricam*, denique *femora*, *crua*, *genua*, *pedes*.

Illud verò, quod in nostrum præsens negotium, præcipuè & exquisitè notari debet, est hoc, quòd sæpenumero in *juventute*, *Hæmorrhagiis* gravibus assveti fuerint homines; *intermediâ* verò *Ætate*, sive *vitæ* genere *agiliore* & *laboriosiore*, sive *dieta* temperantiore, (*fœmina* verò præcipuè, partim *mensibus*, partim *puerperiis*) ab illâ consuetudine liberati appareant: Si *declinante* *Ætate*, *otiosiore*, & quod illi putant, *quietiore*, *Vitæ* genere, denuò uti incipiant; *Fœminis* *Menses*, *puerperia*, cessant: tunc post numerosissimos annos, respicit denuò *Natura* ad pristinum illum *hæmorrhagica* excretionis *habitum*, incipit iterum molimina talia, quæ licet *specie*, & *loco* præsertim, à pristinis illis plurimum differre videantur, *genere* tamen, *materia* quoque, *sine* seu intentione, utique minimè omnium differunt, sed in fundamento *idem* prorsus sunt, atque *agunt*.

Unde frequentissimum prorsus occurrit in *Praxi*, hisce solidis fundamentis superstructâ, ut si talis *Æger* occurrat, qui horum generum pathemata præ sese ferat, neque illa magis à puris *externis* causis, *febrilibus reliquiis*, *vulnerationum*, *fracturarum*, *Contusionum*, *Combustionum* &c. noxis prægressis in hæc devolutus sit: certissimò quasi *presagio*, prægressas ejusmodi congeneres passiones divinari liceat, licet per *viginti*, *triginta*, & amplius, annos, nihil horum magnopere acciderit. Et contrà, à *priori*, integrum sanè est, è talibus in *juventute* obtingentibus, ad subsequentes *Ætates*, imò *seram usq; senectutem*, con-

congeneres effectus & Eventus securè subsumere, eosq; prædicere atque ominari.

Qui sanè *Habitus*, uti, suprà dicta ratione, in praxi frequentissimè occurrunt; Ita *hereditaria* dispositiones aut phantasticæ *Matris impressiones*, planè eodem utique spectant, & considerationem in *praxi* non exiguam merentur.

CAP. VI.

MORBORUM HABITUALIUM PROGNOSIS.

Qui Medicinam, vel pro negotio purè *conjecturali*, vel pro exercitio nudè atque absolutè *empirico* seu *experimental*i, habent, eximiè utique convinci possunt, non solum *scientificæ* Affectuum, & causarum ipsorum, *Diagnosi*: sed etiam legitimâ, & benè pensitatâ effectuum & Eventuum *prognosi*.

Est hæc sanè ejusmodi *Scientia*, quæ non modò in genere *certitudinem* Artis comprobare valeat; sed etiam in specie, Medico existimationem non exiguam conciliare, quòd Artis suæ benè gnarus sit, & non modò *Vires*, sed etiam *limites* ejus, probè noverit.

In nostro certè negotio, non faciliùs ferè irrisui sese exponere potest Medicus, quàm si in morbo *contumaci* atq; *rebelli*, frivolum *pollicitationem* *promptæ* curationis, & *plenariæ* restitutionis, temerè prodat.

Unde tantò magis certè circumspectissimum hic sese gerere debet Medicus; & cum hujusmodi affectus curæ *languidissimè* pareant, simulque *diuturnâ*, & sæpè *repetitâ* Medicatione, tempestivè etiam *præservatoriis* regiminibus & ordinationibus egeant; nec minùs providam *dietam*, & *morigerum* Patientem requirant; oportet utique Medicum hæc potiùs tempestivè ita *prædicere*, ut, sive ipse medicationi adhibeatur, tantò magis cautum, & temperantioris vitæ sollicitum, habeat Patientem: sive alius frivulus *pollicitator* inter-

cesserit, ipso tempore judice, dilucescat, uter verè & peritè de affectu senserit atque judicaverit. Nimirum omnes omnino Morbi, quò magis *habituales* facti sunt, eò magis *pertinaces, refractarii, diuturni*, sunt atq; manent; & minimè ita temerè & expeditè curæ obediunt: sed vel omnem *veram* atq; *plenam* percuracionem subterfugiunt: vel ad minimum, non nisi longo tempore, per frequentibus *repetitionibus*, imò *alternationibus* atq; variationibus medicamentorum, quin repetitis *intercalationibus*, interpositâ quiete, tempestivâ demum *reassumptione*, & similibus velut *enchirisis*, opus habent.

Quemadmodum autem hæc *Prognosis*, directum *genium* atq; indolem, & proprium *successum*, atq; *eventum*, affectuum hujusmodi *in se ipsis* concernit; quod nimirum *in se* & suâ Naturâ, *refractarii, diuturni, rebelles* seu recrudescentes, existant: Ita *specialior Prognosis*, de certis ulterioribus *transformationibus*, & respectivis *eventibus* hujusmodi affectuum, haud minùs peritiæ, scientiæ atq; experienciæ, involvit atque requirit. Ubi videlicet ex uno *certo*, sed magis *generali, habitu* præfente, de aliis, post longum denique tempus *successuris*, congeneribus affectibus, certum, & securo eventu *verax* prognosticon, formare licet, quale suprà, in mutuis illis successibus *hemorrhagicorum Motuum habitualium*, notavimus.

Imò, extendit sese per frequenter hæc ipsa *Prognosis*, etiam *in antèrius*, ut è *præsentium* passionum *habitu*, ad alias congeneres jam *præteritas*, argumentari, & quasi securè divinari liceat.

Antè omnia tamen, quod quidem propterea repetimus, *difficultatis, pertinaciæ, & difficilioris* percuracionis præfagium, omnibus utique hujus generis morbis, admodum certò atq; infallibiliter respondet; & Patienti quoq; *securitatis, & diæteticiæ temeritatis* audaciam, tantò magis excutit & dissuadet: ut ad minimum, si hîc obedientiam præstare recusèt, Medicus habeat, quo sese maturè minus felici exitus denunciatione præmuniat.

Cæterum in his ejusmodi Affectuum constitutionibus, rationi utique magis obvium est, quòd, quò *diutius* jamjam invaluerunt, eò *pertinacius* etiam insistant, & *difficilius* cui-cunq; curæ respondeant.

Ex eàdem causà, si maximè *Cura* aliqua ejusmodi Affe-ctuum sic satis feliciter procedere videatur, semper tamen ad-huc latentis *periculi*, & justì metus facilis recidivæ, memorem esse decet Medicum; ne vel ipse à debita medicamentorum *continuatione*, aut *tempestivâ* eorundem *repetitione*, cesset, & vanam spem exitûs *facilis* & prompti, *lati* & *constantis*, sibi for-met: vel *securitati*, *impatientiæ*, *intemperantiæ*, Patientis, ab hoc ipso errore & vana spe, subscribat, & bonum initium curæ, si-mistro exitu obsignet.

CAPUT VII. MORBORUM HABITUA- LIUM THERAPIA.

Formata *Prognosi*, quòd Morbi *habituales* multo actû & usu *Motuum* assvefacti, non citò, *precipitanter*, immediatè de-svescere & supprimi possint; facile subjungi potest *Therapia*, quòd in ejusmodi affectibus nihil directè, *unicè* & *immediatè* ad reliquum morbum suscipi possit, quin simul ad hanc lon-ginquæ assvetudinis indicationem, dirigatur intentio.

Quo ipso nomine, *habituali* affectui, *Methodus* etiam *cura-tionis* ita applicari debet, ut in eàdem, *frequenti*, *repetitâ*, *conti-nuatâ*, medicatione, quasi contraria *assvetudo* inducatur.

Quia verò ipse etiam *habitus* morbidus, partim *materia*, partim *motu*, absolvitur; propterea etiam in *methodo* *medendi*, his *utrisq;* occurrere, necessarium erit.

Peragitur hoc, *Materia* *imminutione*, & *tempestivâ* subtra-ctione, in antecessum, seu præservativè; *Motus* verò, partim *le-vi*, *expeditâ*, atq; *liberâ* *promotione*, partim *circumspectâ* & *tem-pestivâ*, simulq; *moderatâ* *consopitione*.

Materia illa, cum pro diversitate temperamentorum, modò *sanguis* sit, & hoc quidem *communissimè*: modò *lymphatico-catarrrhalis* & *seroso-Phlegmatica* substantia: Factà hâc distinctione, ipsa etiam *subtractio* illius *causæ* quæ peccat, directè suscipienda est.

Hic quidem minimè dissimulare, vel possumus vel volumus, quod etiam jam modò diximus, in *sanguinis* præcipuè, ad excretionē destinatâ commotione, *primariam causam materialem* plerorumque omnium *habitualium* Morborum, sitam esse. Adeò, ut etiam *catarrhalium* Affectuum, *prima* & principalis causa, non alia agnosci possit, si paulò attentius perpendantur circumstantiæ, quam hæc eadem *congestio sanguinis* versus caput; siquidem à *restrictione*, & *detentione* hujus, *serosæ partis* copiosiore *secessum*, & tumidum inde *infarctum* fieri, tam experimentis recentioribus *Venarum ligatarum*, quam ipsa ratione, satis evidens sit: Quorsum pariter spectat experientia altera à *posteriori* quod *sanguinis* evacuationibus, ejusmodi *catarrhales* decubitus intercipientur, & præoccupentur. Unde & *scarificatio* hoc nomine efficax, in vulgatissimo est usu: & inter alia hujus generis numerosiora exempla, notari quoque meretur historia è *Rhasis lib. 36. tract. 3. cap. 2.* à *Zacuto Lusitano Medic. Princ: Hist lib. i. historia 4.* notata, *Tineæ hirudinum* usu curatæ.

Hoc ipso quidem nomine, tum ad *præservationem*, tum ad ipsius *cure* fundamentum, efficaces admodum sunt *sanguinis imminutiones*; siue magis naturali methodo, per *consumtionem*, *Motu* nempe laborioso, fiant: siue per *evacuationem*, *Venæ sectione*, aut *scarificatione*, aut *hirudinibus*.

Quamvis autem hæc Experientiæ æquè ac rationi assensim respondeant; non deest tamen objectio, quod hæ ipsæ etiam evacuationes, aliam molestiam substituant; Cum verò longè tolerabilior sit, spontanea hæc & brevissima, molestia, ejusq; certiore efficacîa, certiores, *pertinaciores*, imò *gravissimas*, ancipitis & *periculosi* effectus, *passiones habituales*, prævenire liceat, & brevi atq; raro hujusmodi obsequiò, Tyrannidem ejus-

mo-

modi Morborum, per levissimas quoquè causas exarsuram, superare: sanæ rationi adversari talem metum, quilibet sanè agnoverit.

Illud verò memori utiq; mente tenendum, quòd si tales *evacuationes*, usum speratum asserere debeant, *locò* utiq;, & *tempore* debitò, *quantitate* necessariâ, *repetitione* sufficiente, & quæ ipsi *proportioni recursus* Morbi respondeant, instituere illas oporteat.

Eodem spectant, *laxationes* & *purgationes* tempestivæ. Si quidem hæ non tantum *in genere*, *serum* abundans evacuando, & primas vias *abstergendo*, *occasionalem* causam variarum talium exacerbationum, semel *assueti* morbidus *Motus*, præoccupant: sed etiam, pro *diversitate*, aut *vehementiâ*, ingredientium, *fortiorem motum*, *circà* & *versus* intestina, inducendo, aliorum *motuum* excretoriorum incommodiorum *destinationem* antevertit & avertit: imò in *commodiorem* viam ducit. Unde non modò *Ufus clysterum*, *acrium*, *revellentium*, imò interdum simpliciter *aperientium*, maximum usum in Praxi exserit; sed etiam inter numerosa exempla, quæ utilitatem prudenter susceptarum & continuatarum *Sanguinis evacuationum*, & noxas earundem denuò neglectarum indigitant, in mentem venit historia *Galen*i quam 6. *Aphor.* 47. & ex eò, cum expositione non indocta, *Zacutus Lusitanus* M. P. H. lib. 1. *Hist.* 39. recenset, de Juvene quodam, qui singulis annis *Melancholiam* incurrens, nisi *melanagogis* purgaretur; horum usu *hemorrhoidum* apertionem quâlibet vice expertus, liber mansit: quoties verò negligeret hoc præsidium, in pathema illud mox prolapsus, eòdem confugere coactus est.

Imminutâ hic *Materiâ* sive *directâ*, sive tantum *occasional*i; *aversò* etiam generaliter *motu*: ad ipsam immediatam, jam factæ *congestionis*, & *fientis* specialissimi *motus aversionem*, *repulsionem*, *repressionem*, *cohibitionem*, specialissimè accedendum. Et hoc quidem *curativâ Methodò*.

Hic tamen nihil *imperu* agendum, antè omnia, si *materia* adhuc abundat.

Motus immaturè non sopiendi tantum, sed potius discutiendi, æquabiliter distribuendi, aut in aliam tolerabiliorem viam, aliorum deducendi.

In talibus rebus, *vera anodyna* sunt, non *narcotica*, sed ita dicta *specifica*. Hæc enim non modò in multis affectibus reverà dantur; & agunt maximè non tam in *materiam morbi*, quàm *Motum* inde turbatum: Sed *enervant* eò ipso, præ omnibus aliis, istas tales *Motuum* exacerbationes.

Verbo: Uti *Materia morbi*, corrigi & auferri debet; ita adversus *habitualement* ejus repullulationem, tantò maturius, & *præoccupando*, hoc agendum est, antequàm *Motus* isti consueti suscitentur. *Specialiter* verò maximè à loco, ad quem moveri, & in quo *Motuum* turbas dare sivevit, avertenda est: *Motus* etiam ipsi, præmissa *materia* correctione & subductione, delinienti, non tam per *Narcotica*, quàm *nervina* temperata, *Cinabarina*, *Nitrosa*, *diluentia*, *specificæ*.

Cum verò princeps *Materia*, sit *Sanguis*, proinde hujus maximè *motui congestorio*, *tempestivis* ventilationibus occurrendum. Cumquè *Animi Pathemata*, & *Sensuum irritamenta*, præcipuè à tempestatibus, & frigore, multum ad *Motus* excitandos possint; Nequè minùs *vini* abusus, qui quantum aliud quicquam, *excretorie sanguinis commotionis stimulus* fit: proinde ab his abstinendum. *Motus corporis* opponendus illis, quæ à *stasi* concitantur; *quies* illis, quæ *commotione* exuberant. Præcipuè verò si quod *stadium* tempus concurrat, illi in specie occurrendum est; Si certus *locus*, ille præmuniendus, & ab ipso abducendum.

Potest hic aliquid, *insignis mutatio* in corpore, aut *Animo*, concurrens. Unde *pubertas*, & præcipuè effectus ejus, in *feminis* maximè, *mutationes* aliquas inferre solet circa *assuetudines morbidas*; *Vitæ genus* mutatum, tam in *victu*, quàm *motu*: *Animi libertas* restituta. *Specificæ*, in curando, omnibus antecellunt.

Et hæc de *Morbis habitualibus*, & necessariâ hujus **FORMALIS**, in multis Affectibus consideratione, & congrua translatione, dixisse sufficiat.

SOLI DEO GLORIA.